

كان المفروض

خالد حبيب

• كان المروض

• خالد حريب

• الطبعة الأولى - أغسطس ٢٠٠٣

• رقم الإيداع: ١٤٢٤٤ / ٢٠٠٣

• شركة الأمل للطباعة والنشر

ت: ٢٩٠٤٠٩٦

إهداء :

مرة ثانية

إلى
حبيب يوسف
بساطة الإنسان والأحلام المغدورة
ولا بد أن يكون الإهداء أيضا إلى
ليلي خالد حبيب
الضمير والهواء والإجابة عن الأسئلة

خالد

و..هؤلاء:

كثيرون الذين تقاطعت حياتهم مع حياتي وأنا لا أضمن الأيام القادمة حتى أقول لكل منهم على حده ... أنك يوما كنت صديقي ..

من أيام "سيد الشامى" و "حسن عبد الشافى" و "أسامه مرسى" و "حسن السيد حسن" إلى أيام "محمد ربيع" و "مدحت منير" و "جلال الجيزاوى" و "جمال حراجى" و "محمد حلمى" و "عبد الحميد بسيونى" ..

أما "هايز الجبالي" و "إبراهيم حريب" فلا بد أن أقف لهما إحتراما ..

ولماذا لا أشير أيضا إلى الذين لم تتعد أعمارهم عشر سنوات "رامى عبد المجيد" "محمد على حريب" "حازم عبد الحكيم" "محمد جمال البحيرى" "أحمد جمال" ..

وهل يمكن أن أهدى إلى الأماكن بعضا من روى مثلما أهدتنى هذه الأماكن بعضا من حياة "الإسماعيلية والشارع البحرى"

"ميدان طلعت حرب وجريدة الأهالى" "حزب التجمع" "مقاهى وسط البلد" "قاعات الندوات" "ساحات المتظاهرين"

وللراجلين ذكريات مضيئة "على صميده" "محمد عيسى" "أشرف دهشان" "إبراهيم عمر" "مجدى حسانين"

ولهؤلاء ذكرى النضج والمسئولية "أشرف إبراهيم" "عبد الستار حنيفة" "على حريب" "د . محمد أبو الغار"

"أشرف السركى" "حلمى سالم" "خالد إسماعيل" .
واليكى أخيرا يا واحة فى الجحيم ..إليكى يا أمى

هذا ما استطعت كتابته

خالد

ما تخافش
من تركيب سنانك
ف لحم قفاك
على الأقل
هتغنيك
عن حذر واجب

يحصّل ساعات

زغب
وريش صغير وكلام كبير
أنا كنت فاكّر حاجة
لكن نسيت
ما زعلتش ولا فكرت
مشيت أدندن و الطريق فاضى
صوتى عاجبنى
والليل بيسرق بوسة م الإسفلت
صوتى وحش
تحت العمود والإضاءة المبهرة

صوت خطوتي
حالة م الغنا الصافي
يمكن ف العتمة الجاية أغنى
لو ما طلعتش عليا
عسكري الدورية وسألني عن إثبات

بينى وبينك
مالوش لزوم الغنا
أودق الخطاوى
عشان ما أكشفش
العسكري السقعان
وهو بيغسل مع آخر الليل
عربية البهوات
مضطوط
هو ده الموضوع اللي كنت ناسيه

و افتكرته خلاص

بخطوة !!

بخطوة

تقدر تطلع درجة سلم

بخطوة

تقدر تخش المترو أو تركب الأتوبيس

بخطوة

تقدر تطلع فى البلونة تشوف الناس

وكماتن تقدر

تتأمل خطاويهم

بخطوة
يمكن نتلاقى هناك
ونقدم كل الشكر
لشركة بيرة الأهرام
وتاخذنا النكتة المشهورة
عن ابن الرئيس
لمكان أوسع من خطوتنا

وف قلبى
هتدوس الخطوة الثانية
وأشيلك
مع صورة بنت بترقص
على دمي
من قبل ما اخطى

مخاصمكم

مال الورق ع الذكريات
بيحن للى من عشرين سنة
فرحان بكسر الايزان
متداوى بالنشوة
من غير مؤاخذه
كان الولد طالع من المالح
من غير هدوم
فاتفزعت النسوان
وسرقت
بصتين من تحت
من خيط بسيط
يربط ما بين المتعة

وقبة الجامع
عشرين سنة
طرح الطريق اسفلت
واتبدلت حكايات
كان ممكن
تخلص الحدوتة
ف خبطة عربية
أو فيروس فى الكبد
كان ممكن
نتصالح
شرط ابقى حاجات
وحاجات
وحاجات
لكنى من عشرين سنة
فرحان بكسر الايزاز
والطلعة م المالح
عريان
مسامح روحى
مخاصمكم

اللحظة

على شرط
نتقابل ف ميعاد مضبوط
ونخش ف تفاصيل اللحظة
من غير إحراج
أو سرقة
أو حتى دموع
يمكن
نتدارى شوية عن المشيين
وعن عين
بتصور حركة شفايفنا

إن كانت
غضبانة
تزوم
وان كانت
بتدوب ف اللحظة
فتروح مفتوحة على الآخر
مبتسمة

على شرط
نتصالح
قبل الموت ما يفوت ف الرقبة
نتقابل
ف ميعاد مضبوط
ونغنى

ع التراييزة

على تراييزة سفرة
الأكل نضيف
وعيون بتمد ف حبل الود
بحرص محايد
ووشوش من شمع بتضحك
وتزق البرد فى عضمى
بكل هدوء

ع التراييزة
اتحط كلام إفرنجى و خوف
يا تموت خوفك
يا تموت خوفى
ما تخافش
أنا شلت الخل من السلطة
وظبط الملح

عفريت

ماتخافش
هنقسم كل الخوف على بعض
وهنضحك
ع المنفوخ أبو كرش
بكذبة
أنا هالبس
وش يكون عفريت
وأنت تشد الكرسي بقوة

لورا ح ع الأرض
يبقى الحل ف عود كبريت

تراتيل

ماكنش واجب تنتحر
وتنط من فوق الرصيف
نازل الشارع

وينكتب لك وردتين فى الحرب
وردة علشان بتخاف
التانية لجل الصبايا
يحبلا بأحلام

يا غنوة محشية بكلام
لو تسمعيني مرة واحدة
أنا كنت أغير هدومي

وكننت اطرده همومي
وأحاول الابتسام
عن طريق القلب
الفجر كذب ف كذب

تراتيل بتعشق
فضا مايسمعشني

بقرة بتولد
التور بيحزق
ليه ؟!

البحر من تانى

البحر
بيكتب معناه
على رمل ضعيف
ويهد البيت اللى الأطفال بانياه
البحر بيبقى عجوز قدام الصخر
ويعمل عيل ويعيط
والناس تتمتع ببكاه
البحر
مازال غرقان فى القهر
وشوفوا النكتة
البحر
بيقهرنا
معاه

أنا

سورة التين

هاتداری

ورا عقب سجارة

وهزغزغ رجل الماشيين

لو ضحكوا

راح أقول بجسارة

إن أنا وانتم

بنی آدميين

متعة الأحران

حزنك
تربية شوارع
وجنونك
ببشارك فى تفاهة اللعبة
من قبل ما ترفع كل راياتك بيض
كاشفين السر
بتراوغ
من فك الكماشة
ويتهرب
لبلاذ فى دماغك
ويصدك

فى نهاية الدنيا الشط المالح
تنزل م الدور الخامس
نفسك مقطوع م السلم
مع تكشير مدقوق على وش جيرانك
يفتح الشارع لحزنك
كراسة التعبير
ويعلمك
تستمتع خالص بالحزن

مغامرة

يمكن تراب الفرن ينفع دوا
لو ما لحقتش تربط جرحك
بالصبر والقطن الطبي
من قبل ما تطلع فى التليفزيون
وقفاك للكاميرا
وتقول
أصحاب الخير زقونى
واتعلمت أشم النار
من غير ما تقدم براهين
صدقتك
وقفلت الباب
على جرحى المفتوح للملح
وقعدت أفهم نفسى
إن أنا مش ندل

الأراجوز

(١)

داير على كل البيان
شاعر
راسم شفتين ضاحكين
وشمساية
وقمح بالفدادين

ما تقولش يبقوا لمن
اعرف أكيد انهم
ما يعرفوش وشي

(٢)

تايه في هذا الزمن
ما بين حاجات يا ما
ما اعرفش متصبح ولا متمسى
معرفش ده بكرة
ولا يكون أمسى
تايه ما بين نفسى

متهريش منى
يا كل شىء أنت
عمرك فى ليل الصمت
على قلبى ما هنت
لحظات
بدوب فيكى
وساعات بخاف منك
لأنك
شاربة نضيف دمي
غازلة نسيج غمي
صلبانى فى الميدان
تمثال ضعيف البدن
مهزوم من اللا شئ
زارع غيطان الأمل
شارب بحور الضيق
والحزن
بحر عميق
ومجدافى
ضاع منى

(٤)

كرهت وش المدن
والطريق الاسفلت
مازالتي
برغم طول المسافة
عاشق
عيون
الناس

ملاح

(١)

أول إحساس العجز
أنك تلمح
شعر أبيض لافف قلبك
والحزن يمشى على رجليه
بنى آدم صاحي
أول إحساس الحب
إن عنيك تتوتر
لما تشوف الحلم قريب
لما تدوق السكر مالح
تبلع طعم الملح مسكر
اعرف إن
اللحظة بتفرق بين حالتين

الحلم بتاعنا راح على فين ؟

امبارح

كان واحد صاحبي بيكتب بكرة

على مفرش تراييزة ف بار

لسه ملامحه فاكرها كويس

سهلة بسيطة

زى كلامه لما يكون مطمئن

(٢)

لكل واحد حلم

لكل واحد هم

ولكل واحد ميزة ع التانى

أنا قلت أقوم من كيوتى

واغنى أحزانى

"إحنا كلام وسكات

وشعر بينطفى فى الحلق"

كان العيار طايش

والوش من قبل أبويا يموت

جرانيت وبيشقق

جواهرجى بيدقدق:

- ادى لخيالك فرصة يتكلم معاك
- ادى لعيالك حلم واسقيهم غنا
إحنا اللي فى الكراسيات
كتبنا كل الوصايا
وحفظنا كل الطرق
وعشقنا كل الصبايا
(٣)

دخل الكلام ف حوارى سد
ونور مقطوع
لما حاولنا الرجوع
فشلنا ما عرفناش
سألنى صاحبى عنها
غايبة عن القهوة من سبع تيام
ما عرفنا راحت فى
هل العجوز خضها لما قلع توبه؟
ولا العساكر فى الطريق
دهسوا خضار العين
وحرروا المحضر

محاولة للطلوع من جحر

(١)

ابدأ
بنفس العلاج القديم
وانقل حاجاتك
من صحارى الروح
لرضعة الأطفال
من قبل ما تخبى الأكم فى عينيك
وتفرد قوامك
بين الخلايق هزيل

(٢)
دندش حروفك
كتر من الألوان الفواتح
خلي عنين العيال يلمعوا ف الصورة
وأنت كمان ابتسم
اكتب كلام صابح
ولا يشغلك مر السؤال
إن كان فيه واحد فلح
وأنت مش فالح .

(٣)

افتح دراعك واحضن الجايين
عيال تشيل الحلم
بالزمر و التزييط
احضن عينيهم وعينك باصة قدامك
والضهر لازم يكون
محتمى ف الحيط
يمكن قتيل الحلم فجأة يفوق
يبقى قفاك ملعبه
وتبقى أنت عبيط

(٤)

امسك بأيديك حبلىها
وسيبها تاخذك بعيد
مالكش شىء قبلها
ولا شىء يحزن قلبها
والعمر مش مغرى لها
أنت اللى خسرت قولها
إيدى مع الحبل وانت
غاوية بكا وتنهيد

(٥)

اترك جسمك
للمزيكة وللأشعار
واكتب اسمك على جلدك
محفور بالنار

ممکن تكون

رقبتى منصوبة على ياقة الجاكيت
كأنها
هدف تنشين لعساكر محترفة
والجمجمة
ما بتخرمهاش الطلقات
فاخذها السلطان وعملها كاس للخمرة
فى ودانى
خطبة جامع وشيخ بيدافع
عن حيض المرأة
وعن غلمان فى الجنة شواذ
على ترابيزة السلطان

كانت جمجمتى وخريطة لسينا
وكان الموضوع خطة حرب
ع الناصية
كانت الناس بتغنى الوهم
وتمضغ أحزان
الرقبة كانت فى مكانها
مجروحة وبتنزف دم
لكن تفاحة آدم
انقلبت
بق وعين وانف
لو ترجع خطوتين للخلف
يمكن
تشوف الزرار اللي زانق ياقة الجاكيت
وهو بيطيير من مكانه
والوردة
وهى بتدخل العروة
وان الرقبة
ممکن تكون دانة
أو تمثال عاوز يكمل

المرايا

هتفت قدام المرايا
شعار بيجرح الحنجرة والكون
ويرد لى اعتبارى
نتبادل الابتسام مع بعض
ونلمع شعرنا بفازلين
فى المرايا
يظهر الحيط من ورايا
فاسد
مستبد
برواز عليه لسورة الفاتحة
وكلمة "أمين" كبيرة خالص

تستخبي عيني
في الهتاف
واليفط
والدم
والشرار اللي بينط من عين العساكر
ترتاح ملامحي
من اثر الكريم المعطر باللمون
القميمص
كان فيه زرار
مقطوع
من زحمة الناس في الميدان
غطيت مكانه بكوفية
وابتسمت للمرايا
غطيت قزاز المرايا
بابتسامة تمام
فابتسم صاحبي اللي جواها تاني
وانكشفت
كان مياعها فاضل عليه ساعتين
وكان آخر ديسمبر مطر

وافتكرت إنى محتاج ورنيش للجزمة
لما خلعت الكوفية
كان الزرار
موجود
وصوتى فى الحنجرة
مسموع
لما المرايا تكذب على العشاق
يبقى طابور طويل من شجر ميت
بيحرس الصحرا
وعيال بتكبر ع الشعار
وساعات يخافوا
فيصدقوا
ويدخلوا جوا الهدوم والمرايا
وكأنهم بشر
ضامن حياة

يا دنيا يا غرامى

(١)

سبمسار شقق وبيوت
أراضى بنت بنوت
واقف على الناصية
بيغازل الملكوت
ويحضن النبوت

(٢)

الفجر

بسمل وخطى ورايح الشغل

زعلان من رخ المطر

كوفية فوق كتفه

خطوتين رجليه اتزحلقوا

واقع ف بير سلم

الفجر عيط بحرقة

قال الضلام اسلم

(٣)

محتاج للحزن
يفضى من الصدر الأوهام
ويخلى براح الروح أنغام
بيعدد؟ ممكن
لكن بيغنى الأحلام
فى نشيد
وكلام
بيشد الواحد من نفسه
يرجع إنسان

(٤)

"نقحت عليك
أزمة الباشوية
الفجر طالع
زغرتي يا وليه"

نبوت غفير

اهرب الراس
م الهموم
واخلص الروح
من عرق الهدوم والبرد
يدهسنى حارس غبي
ع البوابات ساكت
لحظة دخولك فى النشيد
صاحبة البدن والنفس
ينفك عرض الجبل
سائل عجيب حنة
يا صوتك الجنة
حبيب صفاكى

وندهتك كانت
طلقة ميلاد للفتى
من ع الحدود يرجع
مطلوق لسانى بأمانى
خلى الجموع تسمع
ينشد وتر الربابة
غنوة خلاص الدم
الكوره فورة
والفورة فارت سم
ايدك فى ايدى يا خال
قاتل وليدى ياهم
الشعر فاس
المزرعة روحى
ورغم العطش فى الخلايا
بتطرح النخلة
ويحط جوز الحمام
فى درا سطوحى
كان قلبى قد القول
لما بيرصد قميصى

روايح البترول
ينهش جراد المدن
فى جتة بتنازع
"لا عمر بركة الملح تحلو"
ولا اللى دخل فى القبر راجع"
جامع رصاصى
من الغرام
والحلم
ودراع ما بيكلش
مشوار مقدس يوماتى
بتودعنى فيه
وأنا عينى رغم القصايد
مزروعة بطيابة
ليه الجميل اختار
جنب السكن غابة؟
أنا كنت خايف أصرح
صار الوجع جارح
مشوار بخاف منه
بتدخلينى فيه

لحظة صدام الوطن
مع توهة العصفير
نبوت غفير
مضطهد
صدق الكلام والبحر

السقوط

شفتك
فى وش البحرينية
وشفتك موجة غدارة
بنتجه لى
وكننت أنا مركبة
وسط الرمال زاحف
وقلوعى مطوية
فارد شراعى فى السحاب قلبى
نازف تقاوى الحزن
ع السكة كنا أتنين
كان النيون صاحى

الرؤية ملو العين
تراب بيظهر من بعيد
يهجم
ينهش حبيبتى
ينتهى حتى النخاع
اسمى
يفضل غنايا فى الحلق ترنيمه
"يا دبلى الفضة
عضه الصباغ عضه
خدت الأمل منك
وطالع اتوضا"
كانت ملامحك
يا أم الضفاير كتار
مالية المكان أسرار
مالية المكان
أحزان قديمة
متستفة فى الشنط ع الشبط

ذل المراكب

إطلقى جسديك للبراح
والعيون للشوق
واهربي
من زحمة نهار العمر
لمتعة اللحظة
ولحلمنا المسروق
مفضلش غيرى وغيرك
والطريق السد
مفضلش غيرى وغيرك
نفتح طريق للورد
العمر لحظة شقا
ممطوطة من غير حد

فاكسرى اللى فاضل
من تعقيدات الوصية
وادخلى بكذبة التاريخ علي
أنا كنت راكن ضهرى ع الحيطه
وباستعين
بالحلم ع الأحلام
ماكنتش تعرف عننا اى حاجة
فمسكت ديل توبها
لجل الشجن يتلم
وحصدت نهش الضوافر
فى العينين واللحم
غلاسة الاسفلت
مع شمس غضبانة
الحسبة خسرانة
إدينى سبوبة اديك الاشعار
حالة ميوعة بتزنق الافكار
كل شئ زى ما هو
لكن الزمان اندار
كل الوشوش كسلانين يضحكوا م القلب

والكذب فارس شجاع
مسنود بايد الرب
م السخرية للفعل
الفين طريق مفتوح
يا تبوح بكسر اللحم
او تستقيم مهزوم
الجنس عفريت فى الحوارى
وفى الجسد مارد اصيل
مفهمتنيش
فلبست اسود حداد
واضح وحاد
من جيل بيرفض يسلم الراية
الى جيل ذليل
احنا الهوامش فى كل حدودة
وانت البرئ المستحيل

الوردة

عيدان خشب
وحياة بتطلع
من مفيش
و يفرقك
مطر السؤال
من حارة سد
لسلالم الجورنال
قصيدة
الشوك ف عود الورد
عضك
بدات بشاير الانهيار
هل تستطيع تنحنى
رجال لقلبك
من هزيمة لانكسار!

انت المراوغ فى الطريق
من زحمة التراتيل ف ودنك
للفضا المقفول بكلمة
"متشكرين"
كات خدمتك
فرصة تعارف
بين جبل و طموح فى راسك
إرفع راياتك
بيض وسلم
من غير ما تلمح
سلم رخام منحول
أو باب زعيم مقفول
أو سر
مفضوح ع الورق
انت المراوغ فى الطرق
تلاتين سنة
بتشك ف وجود القدر
بتخلع صابعك السبابة للاستاذ
بترفع
صابعك السبابة ف وشوشهم
لو كنت ثابت ع اليقين
ليه العيال بتفضحك فى اخر الحصة

وتزق اسمك
مع المستمتعين بالموت
بحار على مركب ورق
بتعاند الدفة
وبتلغى حبل الوصال
بينك
وبين الشط
الخط يصبح حرام
لما يجيد ع الخط
فارس على حصان من تراب
بتدفن الجثة
وتشد حبل الفرس
للموت
عدلت بنت فى الشارع
قصة على جبينها
فعدلت خط السير
عكس اتجاه الغير
طالع ما نيش راجع
الا ومعايا كلام
يحكى
عن الوردة

أبريل

فى ابريل اللى فات كسرت حد التلاتين سنة
معرفة اكتب قصيدة
حاولت اسكر وافكر
ابعت جواب لي
حاولت انا
على فرشتى راضى
ابريل ما بيسبش حقه
و معاه ما اقدرش افصل
صهد السنين
ما بينطفيش ساهل
حطى عنكى فى المدي
واتسمى حبه
انا قلبى شايل هوايل

يا دنيا ليه غالبه
مساكين بنطلع من حواريكى
وانت شايفانا
يبقى غرامنا عجوز
وانت فتاة شابة
أحزاني موش بالشعرتطفى
ولا بالكلام الحنين
يا صاحبى هات وصفة
قاللى دواك الامان
وانت عجوز خايب
انا قلت:
قلبي صغير
بالمريلة لسه
يفهم قوى ف البراءة
بيحب حلابسه
بيخش ابريل ف عضمى
ينقلنى ليه م الفصل
قاللى الدوا هوا
فى قلب اموره
وتدخل الصوره
وتكون
برى برضه

بصراحة

الى الشاعر محمد يوسف#

قبل ما نتخافق
اسمح لى ارفع ايدك للناس
واحبيك
واعلن مع شدة اسفى
انك خسران
بالشطرنج
مينفعش تكون منحاز للآخر
مع ذلك
تكتب شعر كويس
وتنحاز لى
اسمح لى

محمد يوسف شاعر مهم وتشكيلى محترف وباحث عن وجع
القلب لم يخرج من الاسماعيلية ولا يريد

علشان صوتنا ميعلاش فى الشارع

اهمس لك

انك مجنون

وموش ناوى تجيبها البر

تتفرز

وتشاور على احلام وهمية

بصراحة يا يوسف

اخواتك لما رموك فى البير

كانوا همه الصح

ما تزعلش

مجنون

بتزق الرسماية فى مصنع

فى العاشر من رمضان

بالليل

بتعد ف برنامج وتفكر

ازاى ما يخدش ولاد القحبة ف بالهم

انك مصرى

شاعر ومصارع فى مثلث قهوة

وكلامك دايم من غير ترتيب

لكن عارف بتقول ايه

والمشكلة

ان انا مش عارف تقصد ايه

اشارات القلب

وىء التوقيت الصيفى
تتغير اشارات القلب
يبقى الواحد
غاوى الليل والصحبة
وسيرة الناس
وساعات
بيشوف احلام ع الحيطه
مع اخر ورقة
ف اخر تقويم للدنيا
لولا الحر وزنقة كل الناس فى جلودهم
كان ممكن نضحك
وهنفضل دايما
رغم ان الواحد

عاوز يقطع رقبة صاحبه
علشان ما رضيش يحلم وياه
احزانك فى الصيف هتدوب
لو قلبك عاشق
ما تمرجحش المعنى
وتكذب
وتغنى
للبنات اللي ماهيش شايفاك
ابعد عنى شوية هاحبك
حواديت الزحمة
وسؤالك عن حالة الجو
لما حاولت ازرع فى القلب
شوية صحرا
نبت جوا العين
اشواك
الدمع غلبنى
وسقانى الحلم المر الاخضر
طلع الورد البلدى معاك
يا رايات مشدودة على الآخر
اسامينا ليه فى الموت يتسافر
قبل الفجر

وقبل ما يبقى صحابى معايا
بنغنى
لبناات حلوين.. ضاحكين.. قاعدين
خلف الشباك
تفاصيلهم تحكى
عن الايام
والدنيا
وموج البحر
وباشوط ع الجون المقفول
وطبيعى .. ما بيجيش جوان
غير ضحكة عيل
لما قلبت عينيه عشانه ف زحمة مترو
فى الصيف
الشعر بيبقى حلال ع الاخر
فى الزحمة
الناس العاشقة الموت
بتموت .. ببلاش
لو تسالنى عن الملاعين
اكلين لحم وعضم البنى ادمين
مش هاعرف اجاوب
لو تسالنى .. عن العاشقين

يمكن نتقابل فى الحثة دى

ونقول مع بعض كلام

قلناه

فى الصيف اللى احنا شربنا معاه

اول نفسين من عقب سيجارة

بنفصل معنى وجودنا

حسب الحالة

حسب الظرف

حسب المخطوط فى جيوبنا

لا احنا حفرنا نفق للشمس

ولا مدينا ادينا ف صدر البنت

مسكنا الحلمة

رقصة سلم

وبنتالم ٠٠ كالشعراء

بس المدهش

-رغم بواخة المنظر خالص-

اننا فى الصيف

بنكون احياء

زغاريد

هربان
من اللحظة
باكتب
عن يمام طاير فوق بحيرة التمساح
وعن ..
فلوكة وصيادين
طالعين يواجهوا الرمل
بالمجداف
ويخشوا
في عضم الطريق .. تايهين

ما بين

درب البرابرة والحسين

ومحطة الاسعاف

يسالنى صاحبى القديم

تقدر تكون عكاز

وانت كسيح الرجل

او.. تشتري الاخلام

من روح ما بتحسش

دخلت عينيه الميدان.. تنتش

بواقى الحلم

من وش اللى ماشيين ع الطريق

واحد..

بيستنى الاشارة فى زحمة مقصودة

التانى..

بينط من فوق خطوط الاشارة

كانت الغترة

بتضحك على بوابة الفندق

البنيت بتدارى فخذها

بنفخ دخان السجاير
كراتين سفنج
ومندلين
وليان
وبنسة شعر
او كلمتين
فى اى مكتب يشتغل بالفاكس
فيها ايه
لو اشترينا العطر من باريس
والجيبه م العتبه
ونستعين بالنفط
ونكشف الركبه
الدبله كانت خانقه الصابع العاشق
وانا
هربان من اللحظه
اكتب
الى بنت الحلال
بكتفها

بتزق صوت البنفسج فى الاوتوبيسات

واحد وتلاتين بشرطه

يرفض معانى المفردات

واحد.. وشاعر

قبل ما يشعر بحاجه

طب

مات

لو تنطلق

زغاريد جهنم فى النهار

يمكن.. يكون.. فك الحصار

رحله

وطن

موت

كلام

او اى حاجه.. والسلام

ممکن تاكسد مخنا

بالفلسفه

والمنطقه

والاحتشام
كانت سلالك
من رخام
تدخل حرملك
فى مكان مزنوق
زحمة الكراسى ٠٠ من غير سبب معروف
والانتظار مكسوف
من رسمة الحالة
وانا كنت لسه
بيشترينى الخوف
تيجى رصاصتك ناحيتى
صوتك يدغدغ مهجتى
وانحنى للرغبة
والاكتمال
قبل ما افهم اننا
راح نختلف
على عدد العيال
لكنى بافهم

اللقمة امتى تكون
متغمسة بالدم
اما اللي نازف
من جبينك خجل
او اللي نازف
م الودان حزن وزعل
او اللي طالع
م الكبد للمرئ
شاعر برئ
بيغنى للحزن اللي نابت على غيار الريق
والامان المستحيل
بكثرة . . بخيل .

كان المفروض

كان المفروض
نطلع مع بعض
لغاية "تبة الشجرة"
وهناك هحكلك
عن عسكرى
شاف العدو
بيحاول يلزق ع الهرم سيراميك
وشاف كمان
ان مواعيد الحصاد اتغيرت
فكان ضرورى
يخلع السروال ويطلع للمواجهة

واضح
وضوح الحرب والحقيقة والرغيف
كان المفروض...
لحظة رجوع العسكرى الفلاح
ترفع
بنات الحى
براقعها
وتبوسه
كان المفروض
يرقص
شجر غيطه
فرحان بشرب الميه من بحر الكنال
وما نختصرش الحكاية
بصورة متعلقة فى ناصية الصالة
للعسكرى
ابو شريطة سودة فى كورنر البرواز
ونقول كلام...
عن نظرتة

عن ضحكته
عن زرعه في رمل سينا
اللى رواها
لكنه محصدهاش
نطلع مع بعض لغاية الاحزان
وهناك هحكىك
عن تسعة جنيه
ضاعوا من امى فى الهجره
عن لهفه ابويا
وانا بطلع
من زنفه امتحان اخر السنه
عن عشه
سميناها بيت
عن قصه
سميناها حياه
هناك هحكىك
ويمكن اخبى شويه تفاصيل
عن مثلا:

لما اتشعلقت ف عربية
ورجلى انجرت
او يوم ما كدبت
واتسببت ف علة لاختويا
وكتير تفاصيل
عن فقر وضعف
وقلة حيلة
لكن محكيلك مثالا:
عن يوم
ما طلعت على السبورة
وكتت الاول
على كل عيال الفصل
المكوية هدومهم
من حقى
اتعايق
وانا باتكلم عن ابويا
لما اتطوع فى الحرب
وعمره معدى الخمسين

وشال فى اسماعيلية حاجات
وحكالى
وهحكىلك حكايات
عن عسكرى
وعن مفترى
وعن حرب لسه مفتوحة
كان المفروض
نطلع مع بعض
لغاية تبة الشجرة
وهناك
يمكن نلاقى بداية الحواديت
او يمكن عقدة لسانى
ما تتفكش

انكسار

استخبى فى ضلوعى
واندهينى من مكانك
تلتقينى بانتظر
تفرحى ساعة رجوعى
السفر ما هوش نهاية او بداية الافتراق
والحكاية
ان يومنا بيتهمنا
ويعاديننا ويعاندنا
وانتهينا بالطلاق
وانطلاق احلامنا لازم تبتدى
واهتدينا للسفر
لميت هدومى من الليالى الميتة
حطيتها فى شنطة خضار
والطموح والامانى منبئة

خبيت فى صدرى اعترافك واعترافى
وكلمتين حب ومودة وانهمزام
غضبت مرايتى من الرحيل المستمر
واتجاهى وغنوتى للمستحيل
بصيت فى صورة معلقة ع الحيط لابيوا
وانكسفت
ومن عيونه اتداريت
ميلت وشى فى كفوفى .. وانكسرت
و م البراويز ع الحيطان انيكيت
سحبت نفسى و شنطتى للباب .. جريت
كانت عيون العيال بتطاردني
ومحطة القطر محملة بالمهمومين
واقف قصاها عرابى
بيشاورلى
بدون دراع
ضاع السؤال من زمان
وانا لسه مستنيه
سيف الزعيم انسرق
ولا حد سائل فيه
كورت نفسى ع الرصيف
وقعدت اتمتم

غنوة للقصب والقمح

الورد طالع من عبيير الناي
مسح الولد دمعته
قعد انتظر
فجر الربيع الجاي
الشمس زاغت م السما
الصبر طالل
من كوبيات الشاي
فكيت رموشى فى الصباح
على صحن فول بايت
وحضنت طرف المخدة
لما المطر صرخ
نزلت دموع السما
زارعة التراب

افراح
ارفع ايديك وانحنى
انسى احتضار القطط
من عضه الفيران
كان الفساد .. للدم
الغيبه .. للشريان
الشعر رفض الدردشة
.. عن جرحنا
وانا قلبى كورة شراب
متخبطه ف رصفان
دخلت غيط القصب
عض الكلام صدرى
الفجر مش فجرى
شالت ايديا الكلام
رسمت لحضن الرخام
"احنا ف زمان التلوث
جبل النحاس العفى
-من الزكام - سوس"
حضنت عينيه الشوارع
والناس العزاز
انا كنت اخاف م القزاز

وما اخفش م العفاريت
زودت شطة وملح
- لجل ابلع اللقمة -
حضن الحبيبة صبح
تابوت من التوابيت
باعلن سقوطى
واعلن بآن القوت
مالوش اوان يطلع
باعلن سقوطى
من غير كلام جارح
طحنت عضم البدن
وقبلت انا التوديع
انا اللى كنت المغنى
وكننت انا السميع
وكننت وقت الشفق
فارس بالف حصان
كانت قصايد ورق
كانت مزارع قلق
والكذب
بالالوان

الفهرس

٢	إهداء
٤	وهؤلاء
٦	بيحصل ساعات
٨	بخطوة
١٠	مخاصمكم
١٢	اللحظة
١٤	ع الترابيزة
١٥	عصريت
١٦	تراقيل
١٨	البحر من تانى
١٩	أنا
٢٠	متعة الأحزان
٢٢	مغامرة
٢٣	الأراجوز
٢٧	ملامح
٣٠	محاولة للطلوع من حجر
٣٥	ممکن تكون
٣٧	المرايا
٤٠	يادنيا ياغرامى
٤٤	نبوت غفير
٤٨	السقوط
٥٠	ذل المراكب
٥٢	الوردة
٥٦	إبزيل
٥٨	بصراحة
٦٠	إشارات القلب
٦٤	زغاريد
٧٠	كان المروض
٧٥	إنكسار
٧٧	غنوة للقصص والقمح